

Pa su 35 aña den gaita:

Minister Ruiz-Maduro a dedica palabranan di gratitud na Evelyn Lacle

ORANJESTAD (AAN)

— Durante e cendemento di luznan na e rotonde di Mama Rosa, a wordo honra sra. Evelyn Lacle pa su 35 añanan cu e ta den Gaita di cual ocho aña cu e ta cantando. Asina mama Rosa a menciona.

E reconocimiento aki tabata un sorpresa pa Evelyn den presencia di un publico grandi, y tambe di Minister di Cultura sra. Xiomara Ruiz – Maduro, ken a hiba palabra.

E mandatario a expresa cu e evento aki ta den un lugar hopi bunita, unda e rotonde ta estrena su luznan y den e mesun luz aki, di Pasco, nan a pone Evelyn Lacle.

Minister Ruiz a subraya cu esaki ta un temporada cu e

ta gusta hopi, y e ta sigur cu henter nos pueblo ta guste.

Seguidamente el a conta un tiki historia di e persona festeha, sra. Evelyn Marcela Sprok-Lacle, ken ta wordo yama pa hopi hende “Lin” of “Linchi”.

Lin a cuminza canta cu su ocho aña di edad, y asina el a forma parti di e Coro di Misa di Santa Cruz hunto cu Andres Rasmijn, y cu ta sr. Rasmijn tambe ta esun cu a introduci Evelyn den e mundo di canto.

Despues di esaki Lin a forma parti di Brisa Hubenil, un coro di sr. Rasmijn cu a lanta pa canta pa fin di aña. Cu Brisa Hubenil, Lin a canta na Plaza Alameda, a participa na festivalnan y tambe a gana varios pre-

mio.

Despues, Brisa Hubenil a bira “Brisa Banda Show” y cu e grupo aki Lin a graba e prome cancion “Felicidad” tempo cu e tabata tin 12 aña. El a forma parti tambe di e Banda di Tio Juan, di e grupo di Gaita Ambiente y Alegria, di cual el a canta basta cantica.

E mandatario, djis a menciona algun: Sopa de Caracol, Eres Tu, Fiesta de Navidad. Y despues e Omo di Lin a lanta e Grupo Gaitas Sensacionales, di cual e hoben a forma parti tambe, hunto cu mama Rosa y otro cantantenan, y muchanan di e barío di Piedra Plat. Sensacionales a bira popular cu mas cancion, manera Pepe y Zulaica Candela. Linchi a biba un tempo na



Hulanda y mesora cu el a bin bek, el a bay canta cu Wibi y su Gaita Show. Den e grupo di gaita aki Lin a canta hunto cu su yiu muher, Marlina Koolman-Faro, pa prome biaha e cancion Mami, cu a bira un hit tambe e tempo eynan. Despues, el a bay canta bek cu e grupo Sensacionales. Ademas, el a compone y traduci cancionnan manera Niño Divino, Mami, Sunchi, Ay Papa Dios, y hopi mas.

Linchi semper a cooperá cu grabacionan di gruponan di gaita como corista y actualmente e ta man drechi di Mama Rosa, y ta dirigi e Coro di Muchanan di Mama Rosa. Linchi ta stima gaita. No tin duda, esaki ta su pasion y tambe canta y balia, loke e ta haci contento y e ta stima e temporada di Pasco y Fin di Aña.

E mandatario a expresa cu Linchi ta cumpli e aña aki 35 aña den gaita cu ta full un bida, y pesey e tey y como mandatario encarga

cu cultura p’e ta un honor grandi pa brinda Evelyn den nomber di gobierno, y di pueblo di Aruba den presencia di mama Rosa y e barío di Piedra Plat, e palabra DANKI.

“ Danki pa 35 aña di pasenshi, amor y talento mas cu tur cos, pa asina dedica bo bida na grupo di gaita, na fin di aña, sea como cantante, compositor pero tambe como dirigente y awor como man drechi di mama Rosa. Kiermen tur e posicionnan importante y sigur manera nos ta bisa ‘cultura bo tin cu bibe’ y danki na bo Lin, hopi di nos ta biba nos cultura pasobra gaita aunke originalmente ta bin di e Continente di Venezuela, nos tur sa cu mescos cu hayaca riba nos mesa fin di aña, for di tempran nos ta warda nan ansioso pa scuchanan. Abo Lin a duna nos e oportunidad sigur, den bo 35 aña di trayectoria e oportunidad di por biba nos cultura”, e dignatario a expresa.